

編號 2 號

【都市大樹下個原生態】彭瑞珠原作

在吾屋下附近仔，有一間當大、當大間個大賣場。佢兜個停車場脣，還留等原旦種在舊工廠脣個老樹仔，樹下乜還留等一大片個空地，分植物做得用原生態個方式自由大。佢試著，這空地有同這間外國連鎖店加分，因為，佢有分人一種尊重臺灣植物、珍惜臺灣在地生態個感覺。

成時，佢會在樹下臥頭看，看該兜鳥仔，在高天天個樹頂，高高飛、高高奈；有時節，佢會坐在停車場脣個紅毛泥矮牆，看該兜揚尾仔、金姑仔，在高天天個大樹下，定定仔飛、慢慢仔奈。

該兜，翼還言燥個揚蝶仔，乜毋使驚會分晡等佢兜、隨時都有可能搨<sup>1</sup>過來食忒佢兜個鳥仔！因為，四圍都係人屋、車仔、大路，大路該片還有火車不時下南上北，在該確樂確樂<sup>2</sup>！故所，鳥仔佢兜乜想愛飛高高、較自在，係無，若係橫打直過撞著人，抑係分車仔撞著，該就衰哩！故所，這樹頂、樹下，有無共樣個生

活速度、無共樣個生活方式。

你看，該兜錢七<sup>3</sup>，在樹下放勢牯遛，遛到一哪仔、遛到一圍牆！大賣場裡肚乜有賣錢七，幾皮仔就愛賣幾下十銀。該，這一哪仔都係，仰無人摘呢？第一、該，又毋係個東西！第二、你毋驚，有細狗仔正滲啊過尿哦？哪有人，恁無衛生！

熱天個大樹下，該兜葉仔像分床公婆做過記號樣仔個冷飯藤<sup>4</sup>，還會開出一畝<sup>5</sup>畝個細白花，當得人惜！白花無恁白咁，就會間等有烏烏個細果子仔，安到「烏蠅屎」；這，同佢兜發在面頂個烏蠅屎無共樣，係食得個烏蠅屎。你問佢，會去同人偷摘來食無？該，佢無恁慧哪！就同你講過，係有細狗仔正滲啊過尿，該毋就……，仰會恁慧呢！

白飯仔開花咁，做得轉去姐公個山園啊，該位，乜有野生個烏蠅屎，無人洩農藥、乜毋會有狗仔去躡<sup>6</sup>。係無，佢乜做得自家種啊，用花鉢仔，種出佢自家個「原生態」來，你講係無呢？

<sup>1</sup> 搨：音 xio；快速擊中或撞擊。

<sup>2</sup> 確樂確樂：音 kog log kog log；此指火車行進的聲音。

<sup>3</sup> 錢七：音 qien<sup>ˇ</sup> qid<sup>ˋ</sup>；洋落葵，又稱川七、藤三七、土三七等。

<sup>4</sup> 冷飯藤：音 lang<sup>ˊ</sup> fan ten<sup>ˇ</sup>；火炭母草，又稱白飯草、白飯藤、烏飯菜等。

<sup>5</sup> 畝：音 po<sup>ˊ</sup>；量詞，串。

<sup>6</sup> 躡：音 lien；反覆蹂踏。

編號 5 號

【一頭大番樣樹】詹陽期原作

吾老屋跡有一甲个山仔，種恁各式各樣个果子，柑仔同檸檬係種來賣个，另外還有幾頭大梨仔、牛眼仔、荔枝、梅仔、杧仔、山楂、弓蕉這兜係種好搞个。

老屋起在半山排，係一條龍樣式个建築，在中央係廳下。屋面前有一條狹狹个山路，對山下彎彎幹幹開往上。路坎脣生有一頭當高大个土番樣樹，差毋多有兩個大人合圍恁大頭，三、四棧樓恁高。聽阿爸講該頭樹仔自佢後生時就有也，到今怕有四、五十年也！

還細時節，見擺看著番樣樹開花打子，想著過無幾久就做得食著該酸酸甜甜又香醜个土番樣，就開始口涎水浴浴跌。佢兜三、四個叔伯兄弟盲等佢熟，就擎等竹篙同打到當高个番樣敲下來，一儕人敲、其他个人在路項拿網仔接。跌下來个總係比手巴掌較細粒又硬行行个青番樣。同番樣皮刨忒，番樣肉削薄薄仔搵豆油食，該味緒正經湛斗。世大人長透笑佢兜講：「正經係老鴉仔無隔夜卵，愁食毋掣，盲得時就敲敲下來，等到佢熟，驚怕伸無幾多粒哩！」

等到大熱个時節，歸樹身仔恁恁青轉黃个土番樣，在青天白雲个背景下，連同彎彎幹幹个山路，對山下遠遠看過去，就像一幅油畫，靚到耐毋得。毋過，細人仔枵豺，管佢靚毋靚，先落嘴正講。

敲番樣係有孔竅个，細亞仔力頭毋罅，輕又硬程个細竹篙盡好使，過地還愛注意會有黷毛蟲跌下來。還愛記得敲較幼个樹極，做毋得拓著番樣。下背个人手腳溜掠愛在番樣跌落地泥前用網仔接等。

既經熟也个番樣蒂頭會流出白白膏膏个乳，同皮剝啊忒，果汁跔等就淖出來。遽遽歸粒仔送入嘴肚，用牙齒連同果肉剛<sup>1</sup>下來，清香酸甜个果汁黏時流入喉嚨頭，就像在熱燻燻个天時跳入河壩搞水，透心涼。這就係頭擺盡好、盡高級个零嗒，佢兜人條仔一擺愛嘍忒五、六粒正會過願。

毋過，十過年前，為著愛分貨車做得入山載貨，該條山路愛挪直拓寬。該頭番樣樹閃毋過，故所愛倒忒，該央時歸屋下人當毋盼得。今這下見擺對該條山路行過，總會想起：「頭擺這跡位仔，有一頭當高大个番樣樹，樹下還有幾下個細亞仔嘻嘻哈哈拈蛇打蜈个身影。」

<sup>1</sup> 剛：音 gua`；刮，削割。